



SAOPŠTENJE ZA MEDIJE

Hoće li generali dobiti podršku u parlamentu?

Sarajevo, 29.11.2023.


Uz kašnjenje od oko 18 mjeseci, završena je saga s imenovanjem generalskog kora. Nakon brojnih pritisaka domaćih, ali i međunarodnih zvaničnika, na posljednjoj sjednici Predsjedništva BiH postignut je dogovor o imenovanju 13 novih generala koji će rukovoditi Oružanim snagama BiH (OS BiH).

Uz informaciju da je sjednicu obilježio mukotrpan proces nastojanja za postizanjem saglasnosti, što se možda i moglo očekivati, dodatnu sjenu na predmetni politički dogovor objelodanio je zamjenik ministra odbrane BiH, gospodin Slaven Galić. U svojoj izjavi, naveo je da izbor generala nije obavljen u skladu s prijedlogom koji je usaglašen u Ministarstvu odbrane BiH (MO BiH) i dostavljen članovima Predsjedništva BiH. Istom prilikom, optužio je trenutnog predsjedavajućeg Predsjedništva BiH iz reda hrvatskog naroda gospodina Željka Komšića da je, umjesto prijedloga koji je došao iz MO BiH, na sjednici progurao ime drugog generalskog kandidata iz hrvatske kvote.

Shodno Zakonu o odbrani BiH, generalski kor, na prijedlog ministra odbrane, postavlja Predsjedništvo BiH, a ovo postavljanje potvrđuje Parlamentarna skupština BiH u roku od 45 dana od dostavljanja predmetne odluke. Biće zanimljivo vidjeti da li će primjedba zamjenika ministra odbrane BiH gospodina Galića predstavljati prepreku za dobijanje potvrde imenovanja novoizabranih generala od oba doma državnog parlamenta.

Da vladavina prava nije mjesto koje je našlo plodno tlo u BiH te da zakonske odredbe ne predstavljaju prepreku za funkcionisanje političkog i pravnog sistema BiH, mogli smo se uvjeriti u dosadašnjoj praksi. Ni postojeći saziv generala u OS BiH nije potvrđen od najvišeg zakonodavnog organa vlasti što ga nije spriječilo da nesmetano obavlja svoj produženi mandat. Slično je bilo i s imenovanjem novog direktora Obavještajno-sigurnosne agencije BiH (OSA BiH). Za njegovo imenovanje bile su potrebne konsultacije, između ostalog, i sa Zajedničkom komisijom za nadzor nad radom OSA BiH Parlamentarne skupštine BiH, a koja u to vrijeme nije bila ni uspostavljena.

Put BiH ka Evropskoj uniji zahtijevaće sveobuhvatne reforme u oblasti vladavine prava pa se nadamo da će se i ovi demokratski deficiti približavanjem i ispunjavanjem uslova za članstvo morati unapređivati i građanima pružiti punu zaštitu njihovih ljudskih prava, ali i institucionalnu sigurnost da se zakoni provode u punoj mjeri i da su jednaki za sve.


dr. sc. Denis Hadžović
predsjednik Centra za sigurnosne studije

